

四庫全書

集部

# 欽定四庫全書

集部

小鳴稿卷五

詳校官監察御史<sub>臣</sub>曹坦

中書<sub>臣</sub>劉源溥覆勘

總校官知縣<sub>臣</sub>楊懋珩

校對官中書<sub>臣</sub>田尹衡

謄錄監生<sub>臣</sub>何永泰

欽定四庫全書

小鳴稿卷五

明 秦王朱誠詠 撰

七言律詩

半村為姑蘇湯隱士賦

別墅深深習隱居  
半依城郭半郊墟  
門前流水漁郎棹  
道上飛埃使者車  
隔岸市諠來座遠  
捲簾山色入窓虛  
雲泥出處都隨分  
野有良田案有書

送都憲孫世榮四川巡撫

紫泥封勅下金鑾  
進擢都臺鎮錦官  
分陝未終秦地愛  
濟川應遂蜀人歡  
雪山又為公來重  
雲棧寧辭馬度難  
從此諸番皆慕義  
不勞兵甲從戎鞍

一覽亭為保安王肅齋題

構得幽亭瞰小池  
四時風景總相宜  
百年圖史勞雙眼  
萬里乾坤醉一卮  
花雨撲簾紅片片  
玉山當戶白差差  
傍人却訝仙凡隔  
載酒無因為問奇

送李少叅希范致政還鄉

囊封情疏達天閣  
乞得身閒荷寵恩  
召伯愛多棠勿翦  
淵明歸早菊猶存  
九峯結社詩千首  
三泖維舟酒一樽  
除却賞心并樂事  
只將家學授兒孫

送郁文博少叅致政還上海

天恩乞得下明光  
回首鄉關舊路長  
風月有情歸篋笥  
烟霞無夢到巖廊  
數盃濁酒黃花徑  
十里青山綠野堂  
遙想鱸魚秋正美  
一竿終日釣滄浪

遊仰天池留別性空和尚

絕巘靈湫一脈通  
翠光垂彩浸虛空  
三千世界紅塵外  
十二樓臺寶鏡中  
琪樹影長留晚照  
曇花香煖遍春風  
我來自有三生約  
最喜高人得遠公

壽伯汧陽王恕齋五十

半百年來五福全  
秀鍾光岳陸生蓮  
蒼松翠栢風霜古  
玉葉金枝雨露偏  
鶴背有書來碧海  
弧南增彩燭瑤天  
霞盃滿進長春酒  
願祝莊椿壽八千

印湛然鍊師道院

五銖霞帔七星冠  
洞府朝元禮數寬  
一榻白雲香篆裊  
半窓靈籟竹聲寒  
瑤壇鶴占千年樹  
金鼎龍蟠九轉丹  
物外紅塵渾不到  
碧桃花老任春殘

病鸚鵡

靈禽不耐病摧殘  
衣褪穠蛾嘴褪丹  
無力似人方倦極  
有情對主欲言難  
雲深隴樹歸心遠  
月滿秦樓舊夢寒  
敲損玉壺渾不應  
空餘香稻長闌干

秋夜

燭黯緋羅火尚溫  
卧聞清漏咽重門  
露溥仙掖蘭香細  
月轉雕欄桂影繁  
遣戍有懷勞士馬  
維藩無補愧君恩  
起來吟得悲秋句  
却怪詩魔惱夢魂

劉節婦

結髮曾期百歲同  
可堪中歲命途窮  
孤鸞影去青銅冷  
別鶴聲沈綠綺空  
烈火難銷心上鐵  
韶華不到鬢邊蓬  
西風一榻清秋夜  
露葉蕭蕭墜井桐



賦得潼關曉騎送盛舜臣還吳

重關高聳玉繩低，曙色微分柳外堤。  
遠道有人催去馬，清時無客效鳴雞。  
帝城瑞日瞻來近，親舍孤雲望欲迷。  
去去不須增感慨，好將形勝入新題。

送戴松崖之浙江憲長

三年提學擅芳名，此日遷官沐寵榮。  
關右文風歸渾厚，越中民物待澄清。  
霜寒驛路豺狼遁，日煖梧岡鳳鳥鳴。  
此去臺端聊駐馬，聖明虛席待阿衡。

輓國戚廖都閫之父 二首

少住人間四十秋，乘雲又作帝鄉遊。  
紫宸有寵來丹誥，黃土無情瘞黑頭。  
共倚嫖姚終破敵，誰知李廣不封侯。  
白楊風起棠梨冷，地下英雄亦解愁。

壯志曾期馬伏波，功名未遂恨如何。  
駕雛繼武勲勞重，鸞誥貶恩寵渥多。  
海上有時來白鶴，人間無路返青騾。  
刻銘幸有如椽筆，千古聲名耿不磨。

輓廖母秦太夫人 二首

萬里良人事遠征義方教子早成名七旬祿養三牲備  
雙誥恩封二品榮夜雨萱花堂背落春風芳草墓前生  
賢郎閫帥追思處忍聽慈烏夜夜鳴

星沈寶婺夜光微七十年來祿養違不意叢萱摧暮雨  
空令寸草戀春暉瑤池有路旌幢遠滄海無潮信息稀  
留得堦前慈竹在清風依舊滿庭闈

輓國戚廖廷璽都閫

二首

劍氣橫空結暝陰英雄觸目亦傷心龍蛇陣古風雷壯

狐兔羣多草木深雲散柳營春寂寂鶴歸虎帳夜沈沈  
邊城爪士知多少目斷旌旗淚滿襟

戰袍簇錦炫朝暉萬里邊城縱武威沙苑不歸蕃帳馬  
將星空墮塞垣扉草荒高塚埋金劍雲鎖空山暗鐵衣  
一段英雄招不返野花香冷雨霏霏

輓廖母孫夫人 二首

瑤池夢斷綵雲飛為吊芳魂淚一揮韜畧資夫登聞帥  
賢明有女拜宮妃麝蘭已向風前散環珮何時月下歸

喜有賢郎真將種龍泉出匣更輝輝

珍重芳名舉世賢老蒼何事澁長年情知龍劍終歸水  
忍使鸞膠別續弦珠翟已空堂上母彩輶翻引洞中仙  
惟餘二品夫人誥夜夜虹光射九天

除夕有懷戴松崖

坐銷銀燭夜窓虛感慨流光逼歲除千里故人空有約  
三湘歸雁竟無書風驚爆竹鴉聲亂雪映寒梅鶴影臞  
滿酌屠蘇還自遣關西何日候輜車

送梁廷美都憲巡撫湖廣

九五飛龍泰運開  
大藩方伯進都臺  
隨車雨自秦關去  
有脚春從楚甸來  
和璧定為稀世寶  
傳舟原是濟川才  
聖明正爾思賢佐  
雙佩還應接上台

藩庭別意為賈希名都憲賦

祖席休辭酒滿斟  
匆匆離思轉難禁  
乾坤納納誰非客  
湖海悠悠獨此心  
素履久同水與蘖  
歸裝贏得鶴隨琴  
天涯明日遙相憶  
目極暮雲春樹深

寄戴松崖

地北天南嘆別離  
此心無日不興思  
雲霏茗椀閒邊話  
月隱華燈醉裏詩  
秦苑陽回花放早  
越江霜冷鴈來遲  
孤山閒說梅如玉  
莫惜春前寄一枝

送齊應璧鴻臚脩祀禮成還朝

萬年天子篤同宗  
遣祀園陵禮秩崇  
使者虔恭將德意  
先靈彷彿著儀容  
空山夜靜風雲繞  
大地春回雨露濃  
歸近天顏如有問  
為言存沒感恩同

哭憲皇帝

玉帛常思拜冕旒此生誰道竟無由九重宮闕風雲慘  
萬里山河草木愁昧谷日沈天漠漠鼎湖龍去路悠悠  
宗臣一掬傷心淚灑向黃河日夜流

送湯半村西遊

千里來遊百二州又騎羸馬向西遊蕭條自嘆馮唐髮  
凋弊誰憐季子裘渭水斷鴻投遠渚隴山落木動高秋  
老懷料得行吟慣不似尋常動別愁



送人還閩

楊柳經霜葉亂飛  
雙旌迢遞出關西  
紫萸黃菊牽歸興  
綠酒紅亭惜解攜  
宦邨清風隨驛馬  
客程殘月促晨雞  
故園到日應多暇  
好把新詩取次題

送鄭琴士南遊

壯遊知不憚驅馳  
東望三衢信所之  
流水高山琴裏趣  
陽春白雪馬前詩  
豈無遠道鶯花好  
為有高堂鶴髮垂  
慈竹滿庭春酒熟  
歸期須及燕來時

冬日牡丹

愛日微暄破錦叢，永春園內小亭東。  
虛疑玄帝為青帝，却訝寒風變煖風。  
松竹有情同晚節，雪霜何處避春紅。  
眼前生意多如許，可是能回造化功。

寄湯半村

長安相見即相知，千里那堪久別離。  
夜雨寒燈勞遠夢，暮雲春樹動長思。  
花明杜曲鶯啼早，天濶吳江鴈度遲。  
芳草一庭書館靜，煮茶何日細論詩。

題印湛然鍊師畫像

畫史丹青妙入神  
毫端應怪寫來真  
松風蘿月閒中趣  
野鶴孤雲物外身  
脈脈靈源清似水  
溶溶生意藹如春  
風雷叱咤尋常事  
信是人間有道人

涵碧池

分得瑤池一鏡開  
翠光澄徹淨無埃  
雕闌晝永眠春柳  
文石秋深鏤雨苔  
菡萏多情紅間白  
鴛鴦有意去還來  
無邊風景供遊樂  
細數行吟日幾回

湧金橋

長松修竹共陰森下有方塘幾許深玉井遙分泉脈脈  
彩虹高卧夜沈沈昇仙有志空題柱過海無憑浪費心  
誰似主人襟抱濶芳尊吟倚曲闌陰

春日雨中

冷風冷雨過殘春景物無多跡半陳色褪荼蘼紅粉淡  
愁低楊柳翠眉顰翰林賦罷江沈月金谷樓高玉委塵  
自古興亡皆有數達人何用苦傷神

同閻文振方伯仰晉卿憲副池亭小酌

綠荷池上小亭臺紅白蓮花映日開  
喜共薇垣高士話  
況逢冰署可人來  
謾將景物酌詩句  
何用笙歌送酒盃  
坐久香風生白苧  
不知身外有蓬萊

春暮書懷

鳥啼花落減韶光  
節序相催有底忙  
堤柳絮多迷燕子  
渚蒲芽短露鴛鴦  
匡時獻策知無補  
對酒吟詩喜欲狂  
況是眼前生意滿  
濡毫寧憚索枯腸

寄戴松崖都憲

二首

南北睽違思不窮  
遠將音問托鱗鴻  
百年天地能容我  
此日經綸正倚公  
直遣窮陰回淑氣  
還聞澆俗變淳風  
西窓夜雨何時會  
樽酒留連一笑同

契合金蘭獨見君  
索居應嘆久離羣  
乘輅只在商山外  
放棹難尋剡水濱  
霄漢功名推獨步  
江湖聲跡喜相聞  
畫樓幾凭闌干立  
目斷天南日暮雲

元夕分韻得紅字

華堂燈燭影搖紅。此夕衣冠宴集同。開口況逢時節好，賞心休放酒盃空。千年奎壁星重聚，萬里烟霄月正中。情景可人須盡醉，咏歸還向舞雩風。

送王尚文少叅致政還金陵

霄漢功名志未伸，使從岩穴問通津。江東國士無雙士，林下閒人見一人。門近清淮多白鳥，堂開綠野斷紅塵。五千書卷床頭在，舊業弓裘未是貧。

送馮原孝郎中奉使還朝

建節宗藩冊禮成鳴騶千里上神京  
賓筵此日看儀度虎榜當年識姓名  
五色長虹光不掩千金良璧價非輕  
趨朝正是陽回日上苑遷喬聽早鶯

灞橋別意送徐進士還京

驅馳王事獨賢勞使節煌煌又入朝  
紅雨飛花長樂苑綠波芳草灞陵橋  
秦關百二山河壯京國三千道路遙  
宵旰只今圖治切早施經濟答唐堯

送王述之陞山西憲長



龍蟠金勒下長安  
憲副承恩又轉官  
鵲爲乘秋霜翮健  
法星垂彩夜光寒  
五陵父老遮驄馬  
三晉雲山識豸冠  
料得輕車行熟路  
片言折獄信非難

請人看梅

桃李爭春不耐寒  
老龍獨向雪中蟠  
孤標只許青松侶  
冷艷從教白眼看  
淪茗賦詩聊醞藉  
巡簷索笑足盤桓  
合歡不是無盃酒  
似怪風情近牡丹

送耿好問亞卿祭西嶽事畢還京

聖皇憂旱為斯民謁告名山簡近臣千里亢陽過十月  
一時飛雪遍三秦大烹牲腍勞歌饗少宰精誠動鬼神  
歸去金鑾煩奏對于今民物已回春

賀新竺兄書屋落成

宗藩華構俯層城小結書齋又落成滿架香芸青馥馥  
一庭芳草翠盈盈可人兼喜留談話熟客頻來免送迎  
孔思周情千載趣湛然方寸有餘清

送大叅鄧松坡致政還鄉

兩封情疏達金扉  
乞得閒身故里歸  
上國久依紅日近  
內江遙望白雲飛  
鱸魚膾美充珍饌  
孔雀袍新勝舞衣  
忠孝兩全臣子分  
傍人應羨早知幾

次韻留鄭子初長史懷歸

閒情未許寄盟鷗  
秦國衣冠第一流  
仙桂有香秋淡淡  
貞松無恙晚悠悠  
封王顧我猶青歲  
作相憐君未白頭  
道誼始終期不負  
繫駒非是為私留

挹秀為宗弟永壽王東軒賦

疊石為山列畫屏方塘如鑑對幽亭水涵雲影連天碧  
峰送嵐光入座青爽氣逼人詩屢就清風撲面酒微醒  
等閒自有濂溪趣芳草長留翠滿庭

讀寧河武順王鄧氏世家錄二首

手提一劍歸真主百二雄師勢獨尊彤管銘功輝簡冊  
青門為庶泣兒孫東皇已去花無賴華表重來鶴有言  
六尺孤墳鍾阜外誰將麥飯吊英魂

氣節稜稜壓萬夫平生百戰定寰區丹書鐵券當朝寵

武畧文韜百世模淮泗腴田惟舊業麒麟高閣有新圖  
天家雨露東溟潤況是河山舊剖符

九日與戴松崖湯侯菴賞菊

門外衣冠次第來斯文良會喜相陪天垂晴碧雨初過  
菊帶寒香花正開人世不須傷往事籬根聊共醉深盃  
東風指日回春意還約書窓看早梅

送鄭子初長史致政歸南閩

作相親藩擅德音尊鱸忽動故鄉心匡衡去國多遺草

疏廣還家有賜金綠野雨晴花霧煖滄江月白水雲深  
懸知報主心猶在清夢還應繞禁林

送左廷珍憲使陞都憲遼東巡撫

十載西臺著易冠又遷都憲上朝端九重圖治求賢急  
三輔懷恩拜別難寶鑑光搖關月冷高牙風動海雲寒  
封侯自古多文士斗印期登大將壇

宴保安府池亭席上偶成

路入名園景最幽小亭如畫枕寒流風生朱箔花香細

日轉雕欄樹影浮篆裊香煙霏寶鼎酒傾玄露瀉金甌  
眼前便是仙家境跨鶴寧須閬苑遊

惜紅梅

暫離紫府入秦城水路迢迢數月程北客共知元有種  
東君誰料太無情羣芳各藉陽和力一樹何孤雨澤榮  
醉裡師雄呼不醒翠禽空繞月三更

次戴松崖韻以寓有懷

會合尋常嘆不齊可堪南北復東西門牆化雨歸桃李

霄漢文星聚壁奎思逐楊花同滾滾望迷芳草更萋萋  
不知驄馬今何處伐木空山鳥自啼

無題

四首

闌干曲曲思依依風露涼生白苧衣  
瑤瑟調殘金鴈冷玉簫聲斷綵鸞飛  
夢中說夢猶難信山上安山更不歸  
回首蓬萊三萬里煖雲明滅望中微

聚散無憑若夢中落花飛絮任西東  
金籠鸚鵡髻鬆語綠水芙蓉黯淡紅  
曉鏡芳華空自惜夜燈談笑與誰同



十年零落同心結不是儂家手未工

兔走烏飛有底忙相思應斷九回腸  
新聲謾說朱絃好舊恨誰憐白晝長  
玉虎水寒猶汲井金猊火冷尚添香  
星橋影淡秋無跡碧海青天路渺茫

楚雨巫雲恰好時角聲又起畫樓西  
金屏綉褥空凝望錦字魚箋亦嬾題  
藕斷尚憐絲裊娜花深偏怪霧淒迷  
宵征莫道無眠處賦命從來自不齊

閨情

四首

倚遍闌干白晝長更無情緒理新粧柳眉翠壓春愁重  
桃臉紅添粉淚香潮信有期通瀚海音書無路到遼陽  
自憐不及堂前燕雙去雙來繞畫梁

午夢初回玉漏長粉容香汗濕殘粧篋中羞對班姬扇  
簾底空聞賈媛香暮雨幾時歸楚岫春心何處問巫陽  
閒來寫就相思調一段新聲自繞梁

愁中一刻似年長無復濃粧與淡粧玉頰瘦來慚對鏡  
羅衣閒却罷熏香丹楓有恨隨流水白日無情易夕陽

屈指光陰近重九嬾將黃菊傍釵梁

錦被難溫覺夜長曉來無復學梅粧  
解肩雲鬢千絲亂  
記臂丹砂一點香問約有情絨豈寇引年無意藉昌陽  
角聲催起東樓月顏色猶疑在屋梁

### 送春

榆英楊花亂舞風東皇何事去匆匆  
一庭芳草添濃綠  
滿耳啼鶯怨落紅眼底韶華渾似夢  
人間樂事又成空  
臨歧對酒情無賴  
帶雨尤雲悵望中

心跡雙清為汧陽王作

一片靈臺湛碧虛此身真在水雲居壺中秋月水相映  
簾外春風草不除老鶴枯琴君子操牙籤玉軸聖賢書  
東平未必清如許俯仰無慚樂有餘

送婁廉使克讓朝京

玉驄騰踏使車輕憲節趨朝出雍城旌旆影搖晴雪冷  
珮環聲振曉風清雲中雙闕星辰近天上重瞳日月明  
關輔年來尚彫敝好因前席論蒼生

東軒為永壽王作

搆得華軒府第東，搏桑朝影上梧桐。  
雨香砌草先交翠，氣淑林花早放紅。  
照眼簾櫳迎旭日，滿堂賓客坐春風。  
主人吟罷連枝句，流水心期萬折同。

白雲窩

為霖有待濟恒暘，暫託幽棲覆苑牆。  
縹緲遠連天漠漠，氤氲微露月茫茫。  
晴窓影墮琴書潤，午榻陰生枕簟涼。  
蒼狗白衣隨變幻，肯教飛夢落高唐。

送吳元素長史致仕

緘情纔上九重天  
乞得閒身寵渥偏  
四品進階金帶重  
五花栽錦茜袍鮮  
秦城況有連雲第  
杜曲仍多負郭田  
我喜相違復相近  
沃心還望仲舒賢

元日遇雪

青帝今朝換物華  
故將飛雪逞豪華  
嘉祥偏應三陽候  
枯樹爭開六出花  
耳底豐年先有詠  
眼前生意浩無涯  
粧成富貴應難並  
玉宇瓊樓幾萬家

賀戴松崖陞都憲

薇垣遷秩貳都臺荆楚風烟到處開  
恩命一函從北下福星千里又南來  
鳳麟自古生明世廊廟于今用大材  
昨夜仰瞻霄漢上文光垂彩耀三台

送韓貫道都憲巡撫西夏

盛世籌邊用老成魏公孫子復才名  
紫泥金勅來關輔大纛高牙建夏城  
殺氣凜如秋氣肅法星光並將星明  
塞垣自此烽烟淨廊廟行看佐太平

送周國瑞總戎守鎮西夏

金勒初頒五鳳樓，便催鐵鉞鎮邊州。  
北來已破羌人膽，西顧寧煩聖主憂。  
千里旌旗山月曉，一聲鼓角塞雲秋。  
酌功他日銘彝鼎，定列麒麟閣上頭。

東還上人

千里勞師遠入秦，久聞醫術妙通神。  
坐中不問三生話，指下求痊一病身。  
早使惠風甦草木，要令幽谷變陽春。  
慈悲最是僧家事，況是僧家最上人。



中秋喜晴

三年好景憂中度  
今歲中秋大放晴  
萬里碧空星彩爛  
滿天涼露月華明  
桂香尊俎噴龍腦  
花擁笙歌咽鳳聲  
清賞不知更漏永  
只疑身世在蓬瀛

秋夜雨晴

雨餘林暑盡消殘  
涼氣侵膚却素紈  
萬里碧空秋淡淡  
一天清露夜漫漫  
桂香暗結黃金粟  
橋影斜涵白玉盤  
清思滿襟渾不寐  
詩成還倚曲闌干

雨晴即事

好山排闥送新晴  
石逕苔乾步履輕  
華屋日高飛乳燕  
綠楊風軟聽流鶯  
也知守拙真成拙  
須信浮名未是名  
一笑未堪塵鞅累  
陶然醉咏樂昇平

白兔

金精孕秀產明時  
三窟祥生玉雪姿  
異種料應塵世少  
仙胎元是月宮遺  
冰崖卧處人難見  
草逕行來犬易知  
好共蓬山雪毛鹿  
去隨阿母宴瑤池

映水芙蓉

花滿平堤水滿池水光花影淨相宜  
蜀江霞襯千機錦海國蠶成五色絲  
鏡裏崔徽施巧手溪邊西子露香肌  
本來色相皆虛幻惱亂魚龍恐浪疑

舞風楊柳

灞陵橋畔晚依依搖蕩春光力尚微  
漢燕身輕斜軀袖白蠻腰瘦不勝衣  
長條偏藉吹噓力弱質難禁翦拂威  
寄語章臺休擺亂風流態度有時歸

春日寫景

樓閣深沉畫景長  
淡雲輕靄散晴光  
柳堤風煖鶯鶯巧  
花徑泥融燕燕忙  
歌管傳聲來別院  
鞦韆送影過鄰牆  
青春莫負韶華好  
秉燭還須照海棠

訪城南孝子廬墓

命駕來尋孝子居  
落花天氣日長初  
喬松幾箇一雙鶴  
老屋數間千卷書  
高塚已霑新雨露  
故冢還守舊田廬  
紛紛肉食知多少  
側耳高風愧不如

送脩武伯還朝

親藩封拜禮初成  
鳴佩依然上玉京  
千里河山旋使節  
一方茅土受宗盟  
春回灞岸鶯聲早  
雪霽函關馬足輕  
青歲功名須努力  
等閒莫負舊家聲

送秋官車郎中還京

九重恩禮厚同宗  
天上仙郎遠錫封  
袖帶玉爐香馥郁  
口傳金殿語從容  
秦關自昔山河壯  
漢省于今雨露濃  
看取歸朝還使節  
定知飛步接夔龍

登城

層城百尺勢凌虛  
四面青山列畫圖  
北極九重紅日近  
南山雙壠白雲孤  
天連迥野迷高下  
烟抹平林淡有無  
長嘯一聲回首處  
夕陽歸鴈落汀蘆

畫眉次韻

宮樣粧成忽自驚  
剩添螺綠轉分明  
平鋪秋水雙蛾秀  
淡抹春山八字橫  
顰學西施偏有態  
嫵憐京兆最多情  
等閒莫對彎彎月  
只恐嫦娥也妬爭

夜坐不寐聽雨

積雨兼旬未放晴  
瓦溝銀竹勢如傾  
樓頭畫鼓三更盡  
牕下殘燈一點明  
詩客此時偏得句  
旅人今夕不勝情  
懸知足慰三農望  
稼穡今秋定有成

過宮人墓

綵鸞飛去幾回秋  
枳棘叢深見墓丘  
艷骨香魂千古恨  
斷雲殘雨一天愁  
故宮寂寂春何在  
落日涓涓水自流  
啼鳥聲中增感慨  
肩輿經過更遲留

四友軒

松竹梅花舊有名幽人又結歲寒盟  
翻雲覆雨嫌時態傲雪凌霜有故情  
人物每同三益好丰標況是一般清  
相看冷淡空山裏爾汝忘形度此生

春園行樂

漠漠輕烟淡淡風曲闌干外小池東  
鶯穿高柳分晴翠燕掠飛花落軟紅  
好景只疑圖畫裏新詩都付笑談中  
及時游衍心偏樂鸚鵡深盃莫放空



與弟東軒

一遍賡詩百遍吟吟成猶未愜人心韻逢險峻尤難押  
句到新奇不易尋銀燭燒殘思處苦長髭撚斷坐來深  
陽春白雪真稀少金石難同瓦缶音

望雲思親為陳公輔伴讀賦

甘旨無由奉母慈晨昏常起狄公思孤雲目斷三千里  
寸草心懸十二時飛去不能身有翼愁來空自淚交頤  
誰知我亦傷情切忍誦當年陟屺詩

題陳叔振憲使鴈山永慕卷

家山埋玉幾星霜遊子天涯倍感傷  
宰木有烏風淅淅泉臺無路夜茫茫  
當年獨立心常在此日三遷教未忘  
貌得佳城隨宦轍公餘展拜淚淋浪

丘仲玉少叅晚香亭

小結幽亭用意深西風開遍滿籬金  
飡英自得靈均味把酒誰探靖節心  
冷艷不嫌秋色淡殘枝偏耐曉霜侵  
主人賸有新裁句日對南山取次吟

借山樓為湯侯菴作

十二闌干百尺樓  
千年風景一時收  
不妨老子常開眼  
曾辱高峰為點頭  
爽氣隔簾時冉冉  
嵐光浮座晚悠悠  
姑蘇景物分明是  
底用思鄉感舊遊

淨香亭

小結幽亭傍此君  
百年風雨任朝昏  
濕雲侵晚籠茶竈  
高節凌寒落酒樽  
牕外有時搖翡翠  
風前終日散蘭蓀  
主人對此歌淇澳  
剌有清聲遠近聞

道中遇雪

前驅墮指折弓弦四顧茫茫失渭川  
初訝飛花連碧落還疑美玉出藍田  
隨車綽帶真無異捲幔冰崖絕可憐  
誰道眼前非上瑞等閒三白是豐年

詠雪和蘇長公韻

二首

已密還疎亂更纖襲人寒氣十分嚴  
可能端木皆成粟未必楊花却似鹽  
冷啣銅龍沈曉漏聲酣鐵馬戰風簷  
曉來忽報紅輪上仙掌依稀露指尖

長樂鐘聲散曙鴉九衢風力疾於車折殘渭水竿竿竹  
擬徧梁園樹樹花沃野春回千隴麥層簷氷綴萬人家  
句清無奈茶烟濕撚斷吟髭手謾叉

雪晴

三首

陰沴初消瑞日升田夫于耜擬東興山頭破煖青猶在  
柳眼窺春綠未曾雙艇遠依收釣火一簾深映讀書燈  
人間妙手嗟誰及調燮終歸宰輔能

樓雪初融歲欲更喜聞乾鵲報天晴炊烟早逐朝陽起

春意潛隨野水生雲散佛頭來嶽色風回仙掌落鐘聲  
不知驄馬經行處賦得梅花幾首成

玄冥司令勢何嚴一雪能教數日淹風斂凍雲歸遠岫  
天開晴日上虛簷梅腮破臘爭勻粉筴指緣寒未露尖  
好在田家應拍手瓦盆盛酒正厭厭

雪晴復作

五首

誰翦瓊花促未停海雲籠日上蒼冥地宜薺麥三回白  
山露芙蓉幾仞青寒溜不妨和漏滴春蠶猶愛隔窓聽

江湖此夜看牢落應有高人睡未醒

四匝陰雲動浹旬河山積玉幾番新吟餘瘦骨應憐我  
寒到貧家亦惱人浮世悟來皆泡幻化機流後即陽春  
座中鶴氅清如許緩步能消物外塵

片片隨風欲作圍曉來簾外正霏霏鴉巢深樹飢爭噪  
鵲聚空梁凍不飛雙棹山陰狂客返一簑江上釣翁歸  
玉樓銀海真仙詠已覺當年屬和稀

長空雪意未蹉跎舞屑回風一瞬過藥玉梧船迎臘早

水晶簾幕受寒多清浮石鼎應誰得白戰星堂奈若何  
回首江天雲霧裏短罾疎網伴漁簑

酸風吹雨結陰雲村舍人家半掩門翦水作花看有象  
堆鹽肖虎刻無痕彩毫凍合詩仍健綠酒春回臉易溫  
清興滿懷渾不俗山陰灞水總休論

看雪

雨花雲葉逞新奇翦水何人奪化機掌上芙蓉旋玉女  
空中縞素簇瓊妃郊原瘦蹇衝寒去野渡輕策薄暮歸



寂是柱頭驚舊鶴爛銀城郭此時非

聽雪

玉屑兼風捲地驚坐疑天籟不勝清吳蠶食葉漸無迹  
江鱗行沙碎有聲詩夢又從深夜轉春愁還向隔年生  
閒門要路無遺處誰謂滕神亦世情

和楊憲副應寧過藍橋

搖搖小隊出藍關一路凌兢馬足慳萬里同雲迷玉宇  
滿天霏雪幻銀山枝翻宿鳥驚難定苔長新痕濕未斑

却憶昌黎經此日憑誰沽酒慰愁顏

又和藍田道中

風雪交加歲晚時一年節候又將移  
官庖有廩堪沽酒野店無梅欲廢詩  
白鳳隨車歸院疾銀盃逐馬度橋遲  
關西重見楊夫子猶恐前身是伯夷

送焦知縣陞彰德知府

曾於烏府播芳聲又向花封報政成  
皂蓋朱轡今日寵玉壺秋月舊時清  
愛民須體朝廷意卧轍偏傷父老情

見說調羹還有待一麾寧許久專城

挽余士英司馬父母

紫簫聲徹鳳鸞飛雛鳳呈祥世所稀  
二品褒封蒙異數百年伉儷竟同歸  
理財久擅韋公譽斷織猶存孟母機  
七尺穹碑昭不泯西川山水亦增輝

夜坐聞笛

誰人吹笛倚樓東靜夜聞來迥不同  
嘹唳數聲雲散後淒清三弄月明中  
梅花落盡江城雪楊柳凋殘野渡風

坐久不知黃鶴隔參差樹影上簾櫳

別意送凌卧岩還鄉次韻

三首

術傳盧扁字鍾王兩浙高名海內香去路也知車載穩  
濟時何用劍生芒鷄鳴函谷三更月楓落吳江兩岸霜  
歸到蒼溪尋舊侶畫船詩酒水雲鄉

束書孤劒別西秦紅樹青山潑眼新千里風霜欺老鬢  
五湖風月寄閒身灞橋驢背驚殘夢函谷雞聲促去輪  
料得紀行多賦咏郵筒毋惜寄陽春

先生為客感秋聲，豈憚還鄉兩月程。  
囊裏有丹皆玉液，釜中無飯不青精。  
月殘茅店雞三唱，霜冷河橋馬獨行。  
去去天空風正急，渡江須待暮潮平。

寄日華上人

秦城分手一年過，眼底流光逐逝波。  
冷澹情懷交去久，平安消息寄來多。  
寶爐香燼同誰話，白雪詩成想自哦。  
徧倚闌干思無限，西風又老半塘荷。

天開圖畫樓為唐府三城王作

十二丹梯百尺樓無邊佳致滿中州山光凝黛當牕見  
水色拖藍遶檻流不用丹青誇獨步真成造物與同遊  
高吟定有詩千首安得登臨一唱酬

御書閣為唐府三城王作

天上頒書寵數優凌空傑閣冠中州六經垂世崇宣父  
萬軸傳家羨鄴侯粉蠹避芸香馥馥晴虹貫日影悠悠  
貽孫燕子留芳遠瓜瓞綿綿與國休

送胡廷倫紀善致仕還鄉

廿載秦藩共我遊蕭蕭華髮已盈頭  
季鷹去國萼初美靖節還家菊正秋  
萬里雲霄雙捲翼五湖烟水一歸舟  
會稽賸有佳山水吟得新詩肯寄不

自題小像

石田揮筆寫吾真身外誰知更有身  
報國寸心元自赤流年雙鬢欲成銀  
愛山常與山為主種竹誰知竹是賓  
茶竈筆床隨處有優游天地一閒人

再遊天池普光寺憶僧性空

不到禪關二十年無邊風景尚依然青蒼遠接千章樹  
紅白新開萬朵蓮習隱不為招隱賦愛山寧惜買山錢  
獨憐惠遠今何在孤塚斜陽帶晚烟

慰新齋兄

握手常嗟會面疎年來尤覺甚於初身同野鶴清尤健  
計比巢鳩拙不如莫為事煩妨食息且教心靜樂琴書  
誰言淡泊中無味淡泊從來味有餘

次三鎮國慎獨齋竹軒之作

二首



築得幽居類濃西苔痕蝸篆雨中迷出林老榦芟猶密  
解籜新梢長欲齊高咏不妨人逕造虚心似待我留題  
夜闌分付閑啼鳥莫謾啾啾攪鳳棲

隙地新開水竹居遊觀終日從籃輿清陰滿地和烟暝  
涼影橫牕過月虛一點紅塵渾不到萬竿蒼玉自森如  
等閒相對真成趣不用笙歌樂有餘

次三鎮國慎獨齋陪遊後園池亭之作

案牘無勞日日閒每拚臨水更看山綠雲冉冉侵簾細

紅雨紛紛點砌斑三月韶光圖畫裏百年身世去來間  
東平自有天然樂逸駕千年許共攀

年來年去幾番新萬事回頭扇底塵雪裏老梅纔破玉  
雨中芳草又成茵滿鉤簾捲青山曉半畝塘開綠水春  
美景故知常在眼人間俗事浪頻頻

送任進之學正之絳州

匹馬嘶風踏軟塵大河東去是通津金天後夜文星遠  
絳水開年化雨新芹泮綠回官舍曉杏壇紅送誨堂春

人材瑞世從先達  
皋席于今有鳳麟

約戴松崖賞梅因出巡不果

宮庭萬玉擁新梅  
曾約逋仙共酒盃  
千里獨憐青眼別  
一襟誰為故人開  
漫勞疎影橫窓入  
徒有寒香撲面來  
欲折一枝煩遠使  
豈勝搔首望蘭臺

莊誦太祖皇帝御製文集

鼎湖龍去天應泣  
絃管無聲市肆空  
宸翰萬年留聖製  
人文千古續神功  
堯民擊壤風謠在  
周角分茅典則同

秦隴諸孫瞻拜處不禁血淚灑遺弓

覽秀樓為宗兄臨潼王養性齋題

傑構憑虛接上台  
闌干曲曲障風埃  
牕涵渭水玻璃滑  
簾捲終南紫翠開  
歌舞不知誰共醉  
登臨應許我重來  
無邊光景無窮趣  
莫惜新詩為品裁

送魯千之都憲之甘州巡撫

幾年藩省著芳聲  
進秩都臺荷寵榮  
霖雨又從今日作  
泰堦應向此時平  
霜明番落旄頭暗  
春到陰山淑氣生

為語羌戎須遠遁于今萬里有長城

次韻寄致政郁文溥少叅

關陝相逢即故知別來誰料會無期  
金蘭漫憶同心話白雪多慚下里詩  
夜雨一燈勞遠夢暮雲千里動長思  
林泉閒說多蕭散兩鬢年來尚未絲

牡丹亭侍親夜宴

銀燭輝煌照綺羅綠雲飛盡露銀河  
天香國色春無際玉漏銅龍夜幾何  
翠袖舞風嬌不起鳳笙吹月淡相和

霞盃滿進長生酒春到庭闈喜氣多

予祖康王嘗遊翠微山留題永慶寺壁迄今四十  
載寺僧錄詩來謁求和予三復展誦感慕不覺泣  
下因再拜追和時成化庚子九月一日也

當年仙駕到禪宮回首春花幾度紅  
牘有詩篇籠壁上漫勞神物護山中  
騰蛟起鳳奎光在流水浮雲世事空  
一捧驪珠雙淚落九原衰草正秋風

贈湯以脩紀善進階致政

董賈才華擅俊良  
曳裾元侍我先王  
籠鵝書妙黃金薤  
倚馬吟成白雪章  
松栢經霜知不改  
筌蹄得意信難忘  
一封竟遂柴桑願  
又進官階拜寵光

送余士英司馬之京

天書飛下五雲端  
八座崇高禮數寬  
霖雨早收天下望  
法星曾照塞門寒  
當年維岳生申甫  
終古邊城倚范韓  
將相勲名真不愧  
折衝補袞信非難

詠雪次韻

紛紛瑞葉下遙天宮闕高寒攪夜眠指露却愁東郭履  
興闌還笑剡溪船  
党姬風味羊羔酒謝女才情柳絮聯  
最喜太平先有兆一冬三白遍秦川

送賈希召都憲致政還蜀

承流總憲兩稱宜憂國憂民鬢已絲  
裴相抗章求退日  
邊人歸化受降時巴江雪霽鷗波濶  
蜀棧雲連鳥道危  
可是還家使高卧九重無乃動遐思

壽伯汧陽王



花甲將周鬢未絲五朝身際太平時明珠白璧原無玷  
后土皇天若有私雲煖瑞芝森玉葉雨香仙桂濯金枝  
年年此日春如海笑對南山醉酒卮

聞余士英都憲凱旋喜而有作

貔貅十萬度洮河頃刻前徒自倒戈小醜命從今日盡  
名臣功比昔人多一天膏雨消氛氣滿路春風奏凱歌  
聞有巨崖堪勒頌萬人相向為君磨

夜坐納涼

桃笙豹枕竹方牀，爽氣微添白苧裳。  
宮漏穿花聲斷續，疎螢度水影輝煌。  
玉繩低轉繁星亂，銀浦斜連淡月涼。  
清興滿懷詩吻渴，笑拈斗柄挹天漿。

擬送人赴舉

十年經傳費覃思，養就長材未是遲。  
月殿秋高攀桂夕，禹門春暖化龍時。  
士林聲價千金壁，藝苑文章五色絲。  
此去奏名真不忝，便應飛步接臯夔。

送李經司陞知隴州

贊政薇垣屬老成分符又喜領專城九衢父老壺漿餞  
一路兒童竹馬迎行李只隨清獻鶴生涯誰賣隴山鷄  
東風三月長安道側耳行人沸頌聲

擬聖壽節早朝

南極騰光燭紫霄康衢又聽頌唐堯九重宮闕開黃道  
五色雲霞擁赭袍靄靄御香浮黼宸蔥蔥佳氣拂旌旄  
萬方感德多懽抃共祝南山壽域高

春雪次韻

亂灑寒簷已足誇飛來燈夕更光華天孫不記三陽候  
青帝初裁五出花消刺江波浮釣艇潤餘田麥慰農家  
呼童莫待金烏上掃向梅牕夜煮茶

對雪謾成

寒湛虛明耿夜光朝來片片過宮牆輕如柳絮還應濕  
白似梨花祇欠香風韻每憐飄處好詞情偏覺賦詩狂  
玉堂此際清如許不數豪家樂醉鄉

送婁克讓之四川方伯

紫泥封勅下天闈  
憲使遷官向蜀藩  
瑞世百年麟在囿  
清風千里鶴隨軒  
朝廷方岳西川重  
霄漢星辰左轄尊  
從此雪山南下路  
甘棠春暖綠陰繁

乙巳仲春七日聽頒寬恤詔

彩鳳銜書出九重  
聖恩如海遍寰中  
江山清晝風烟散  
天地回春草木同  
二月迅雷驚蟄腐  
一時膏雨起疲癯  
臣民歡忭將何補  
萬歲千秋祝華嵩

輓儀賓曹仲瑣

金  
卷五  
賓館相親歲月多年來霜鬚漸成皤千金偉器元無忝  
半世榮名耿不磨北海樽空虛夜月南柯夢斷冷行窩  
石麟高塚青山下腸斷秋風嘆逝波

周處三害圖

膂力兼人膽氣麤勢同蛟虎虐無辜若非父老一言悟  
安得鄉閭三害無死國能堅忠義節讀書還作聖賢徒  
男兒改過非難事千古英風激懦夫

壽錢員外八十大叅大用之父

八袞封君樂且康  
酖顏偏稱錦衣裳  
樓身有分終幽隱  
裕後多書遂顯揚  
越水吳山鍾秀氣  
少微南極燦祥光  
世間甲子如流水  
笑展方瞳看海桑

會樂圖為宗弟永壽王題

四海承平庶事康  
百年雅會重藩方  
琴樽適興排鴛序  
禮樂提身肅鴈行  
更喜阿咸從阮籍  
且無成義狎寧王  
天倫至樂時時有  
不似蘭亭一詠觴

送暹上人還京

萍水相逢歲未周又看飛錫上神州  
梁恢針驗心多感龍樹機深計莫留  
鴈度碧雲函谷曉蟬鳴紅樹曲江秋  
臨岐且莫傷懷抱更約春風此地遊

和馬天祿憲副隴州簡闕光甫大叅

悠悠汧水帶雲流白草黃沙接遠洲  
風斷歸鴻迷別渚霜寒落木動高秋  
番營人散城邊馬野渡僧歸月下舟  
獨有高閒當此際每將心跡寄菟裘

和次闕大叅韻



報國曾將素志酬  
乞歸還愛草堂幽  
夕陽簾捲吳山碧  
野渡舟橫隴水流  
詩酒放懷三徑地  
鄉園飛夢五雲樓  
身閒況是心無累  
半百年來未白頭

和華亭道中雨晴

五花驄馬鞚青絲  
憲使高秋按節時  
貪吏望風爭解印  
遠人歸化納降旗  
草間泣露蛩聲切  
塵外摩空鳥力疲  
景物滿前騷興在  
不妨頭上雨催詩

和晚渡咸陽

長堤漠漠繞晴川芳草離離接遠天  
幾處夕陽林外鳥半篙秋水渡頭船  
青山伯業成餘燼紫蔓殘碑紀昔年  
薄暮行人呼愈急短衫黃帽立沙邊

壽汧陽伯父

玳瑁筵開簇綺羅  
碧桃花發去年柯  
東平樂善膺名著  
南極呈祥瑞彩多  
翠袂舞風鸞影細  
紫簫吹月鳳聲和  
霞盃滿進長生酒  
醉看桑田起白波

送陳公輔伴讀省親入蜀時其弟進士亦歸省

一別慈闈幾歲寒  
宦遊何處問平安  
太行睥睨雲飛遠  
棧閣崔嵬馬度難  
庭下稱觴堯叟至  
門前衣繡季方歡  
人間家慶如君少  
堂北春深雨露寬

送童世奇黃門回京

近臣承詔下鑾坡  
跋涉其如遠道何  
魚目混珠須辯早  
角弓入酒莫疑多  
人情翻覆真堪笑  
水鑑妍媸定不訛  
行色一鞭催去馬  
華山回首鬱嵯峨

送唐虞卿郎中回京

遙持玉節下秦中萬里流雲素鑑空  
曲直肯撓三尺法  
咨詢都付一心公  
行旌渺渺瞻燕北  
驛騎蕭蕭過陝東  
囊裏封章多少事  
更期民隱達宸衷

和詠雪

六花飛舞亂西東  
一白茫茫路不通  
閉戶高眠窮巷客  
維舟獨釣破蓑翁  
川原繚繞疑瓊島  
草樹高低見玉叢  
最喜豐年先有兆  
未甦生意已無窮

送錦衣楊千兵回京

一片清水置玉壺家傳韜畧更兼儒鼠牙雀角原情偽  
重袴疑金定有無堤柳煖風飛乳燕河橋春水泛輕鳬  
香塵十里長安道笑拂吳鉤上帝都

楊化州清節卷

佐政三州藹頌聲繭絲保障極經營跳梁小醜空為亂  
安堵居民總不驚囊裏肯携包拯硯胷中元有仲淹兵  
關西家世傳來久清白端能裕後生

次楊應寧僉憲留別京師詞林諸友韻

三年讀禮輟慈闈還逐鵷鷺舊伴飛雙闕制頒綸綍命  
五陵士望斗山歸青雲接武天應近絳帳傳經願不違  
留取從行清獻鶴他年堪繡上羅衣

璽書榮捧別詞林祖帳臨岐思不任原委早承明道派  
之無幼契樂天心官居執法飛霜遠人喜從遊立雪深  
密勿廟廊應有待壯年誰許脫朝簪

宣廟太乙真人蓮葉舟畫為永壽王題

水上飄飄一葉蓮真人宴坐穩於船撐歸泰華峰頭月

夢入西湖鏡裏天，衝浪不驚紅雨亂。  
忘機常對白鷗眠，鼎湖龍去仙蹤遠。  
遺澤空存御筆鮮。

送高文明繡衣事竣還朝

權茶奉制撫邊夷，一道澄清屬有為。  
勇角霜威秋肅肅，烏臺月影夜離離。  
及瓜有待催行色，折柳無端動別思。  
關隴近來凋弊甚，封章好達聖明知。

送匡敬敷繡衣事竣還朝

戎政噴勞歲屢更，又持繡斧上神京。  
天開魏闕雙龍近，

雲盡長空一鶚橫  
官道飛埃過雨淨  
驛亭殘暑逐風清  
九重若問三農事  
麴麥微收穀未成

題忠孝節義傳為都閩王徽作

節鉞防邊與弟俱  
一門風化重輿圖  
孤忠報主今應少  
雙節從夫古亦無  
事母孝思恩罔極  
痛姑涕泪眼將枯  
芳名美譽垂青史  
留與人間作範模

送都憲陳叔振作鎮宣府

邊疆作鎮衆稱宜  
攀卧爭緣父老癡  
憲府恤刑崇德望



都臺遷秩拜恩私  
燧烽烟杳防秋遠  
刁斗聲沉警夜遲  
舊煉石皆成五色  
珍藏還待補天維

與強景明伴讀

清水無滓玉無瑕  
魚水相看鬢未華  
詩擬陶韋窺雅調  
文宗韓柳擅名家  
井天典故膺儒聘  
藩邸能官更汝嘉  
慚愧楚筵初設醴  
何如賈誼在長沙

竹窗寫興

四首

幽軒瀟灑傍宮牆  
種得新筠繞畫廊  
寒色滿林秋浙浙

綠陰匝地曉蒼蒼小牕不雨書常潤矮榻無風簟亦涼  
一點紅塵無處著分明身世在瀟湘

滿院琅玕綠染成蒼茫秋色弄陰晴如雲謾作紛紛態  
帶雨常為簌簌聲陸地何時無翠滴炎天終日有寒生  
我來不是閒乘興共結水霜歲晚盟

一片湘雲壓畫欄鳳毛零亂綠成團香生簾粉晴猶墮  
翠滴苔花濕未乾簾影低垂秋霧薄玉聲輕弄晚風寒  
傍人莫訝耽幽興盡日微吟獨倚闌

軒居幽僻斷塵紛不種穠華種此君晴翠拂簷秋瑟瑟  
綠陰垂地畫氤氲滿庭碎玉人空掃半畝清風鶴共分  
讀罷武公淇澳句不知簾外已斜曛

溪上晚景

隔岸山光翠欲流暫停驄馬一遨遊斷雲閣雨天將暝  
老葉驚風樹已秋爭果野猿時聚散傍船水鳥自沈浮  
垂鞭緩策歸來後詩興無邊詠未休

和韻寄日華上人

二首

幾年不見佛圖澄  
龍象天高未許登  
西土重來思有道  
親藩分守愧無能  
曾聞心印傳諸祖  
更喜詩壇續九僧  
料得山居無箇事  
蒲團終日課蓮經

當年曾會景隆池  
千里難禁別後思  
古寺春深花落後  
小軒人靜月明時  
寒山笑謔都成偈  
無本推敲酷愛詩  
何日重來尋舊約  
相逢一笑話襟期

李公隄為岳州守李文明作

洞庭湖水古今同  
岳牧全收捍禦功  
耕藝有田成歲稔

往來無客嘆途窮  
沿隄新柳搖金縷  
傍岸長橋卧彩虹  
昭代擬脩循吏傳  
聲華先已屬觀風

送李文明憲使之任河南

東陵作鎮先諸郡  
西嶽旬宣重一方  
到處蒼生沾雨露  
平生清節凜冰霜  
憲臺赫赫官階峻  
使節搖搖驛路長  
不道梁園還久住  
居然聽履上巖廊

送少司馬王表倫赴京

二首

簡書分陝羨賢勞  
幾見巡邊樹節旄  
戰馬不嘶饒首領

耕農無事醉蒲萄三春雨露滋三輔六籍經綸濟六韜  
八座登庸還有待好將忠赤答恩褒

遙持玉節鎮長安百辟嚴趨仰豸冠私謁不通霜滿面  
秋毫無犯鐵為肝一封丹詔來春殿三品清銜貳夏官  
幸際昇平戎事少委蛇日日侍金鑾

送張應祥繡衣按治四川還朝

繡衣驄馬上金臺好是西川按轡回甘雨一天隨便節  
清風千里斷氛埃故園情思迷松菊先隴恩光賁草萊

五色雲開雙闕近  
朝陽爭看鳳飛來

送夏官楊知微司廳事竣還朝

三孤世閥挺人豪  
贊理兵曹地位高  
霄漢飛騰真不忝  
關山跋涉肯辭勞  
長安秋色隨青蓋  
華岳晴光綉錦袍  
此去天顏應咫尺  
定知喬擢荷恩褒

送談時英僉憲陞任江西憲副

雙旌高捲北風涼  
南望洪都去路長  
洞獠定歸今日化  
野梅應發去年芳  
謾誇搏擊同鷹隼  
共喜翺翔有鳳凰

楚水吳山成遠別作詩聊為緩離腸

閒中

閒中常是笑人忙始覺閒中趣味長  
天上浮雲多變幻人間流俗自炎涼  
推窓對客敲棋局倚榻呼童檢藥方  
茶竈筆床書滿架不妨吟嘯到斜陽

元夕

虛煖東風晚更微  
瑤天皓月正光輝  
華燈萬盞樓頭下  
火樹千枝望裏飛  
宴集衣冠開玳瑁  
詩成咳唾落珠璣



迢迢良夜春如海不醉樽前肯放歸

送丘仲玉大叅之任山西

若翁三晉賴旬宣鵬路追踪有後賢  
藩省甘棠誰忍伐  
瑣闥舊草世爭傳蒲關夜月雞聲早  
汾水秋風鴈影聯  
自是才高留不到巖廊千仞看飛鸞

送仰晉卿憲長入覲

駮駮花驄覲紫宸  
稜稜風采動朝紳  
霜飛豸角三秋肅  
喜入龍顏萬國春  
執法無私推骨鯁  
籌邊有策待經綸

籠街喝道長安市元是西臺第一人

送嚴宗哲太守入覲

五馬驕嘶不受鞭文章太守遠朝天  
蒼頭祇許携孤鶴父老何曾獻一錢  
豈弟從來心宅好廉能多見口碑傳  
朝廷公道明於日此去褒旌定九遷

夏日即事

銀床冰簟暑風清宴坐頻揮玉麈輕  
好鳥向人如欲語新花照眼更多情  
一拳怪石當牕小幾派流泉到沼平

最喜平安軒外竹蕭蕭先已送秋聲

夏夜

火雲纔見斂奇峯隱隱前溪遶晚鍾碎玉鏗鏘風動竹  
零金散亂月穿松荷盤燭影明還滅鵲尾沈烟淡復濃  
吟倚朱欄清不寐可堪宮漏促銅龍

處善樓為永壽王東軒題

百尺危樓喜落成九重賜額一時榮聖經浩浩乾坤大  
祖訓諄諄日月明莫向綺羅叢裏醉直須韋布境中行

傳來天語南山重好學間平享令名

興慶池

綠波流盡草離離畫舫笙歌載昔時海變桑田龍去遠  
雲迷華表鶴歸遲歌臺落寞俱陳迹小殿荒涼有斷碑  
最恨沿隄楊柳樹臨風依舊舞腰肢

與華陰孫令

早沐恩除下九重年來聲譽滿雷封單車出郭多迎客  
羸馬隨鞭每課農雉鳴桑田春盎盎雞鳴蠶市月溶溶

民安物阜應多暇上到蓮花第幾峯

曲江春遊

潑眼春光泛曉晴閒行隨處愜幽情桃花笑客乘時發  
芳草留人特地生烏外雲移山欲動樹頭泉落水如傾  
晚風餘興歸仍在忽訝新詩馬上成

理髮美人

金盃沐罷水沈香謾解雙鬟趁晚涼蟬翼輕盈籠薄霧  
鴉翎閃爍出殘湯凝脂翠縷風前滑窄地青絲鏡裏長

金人四庫全書  
卷五  
惱殺多情驚一見似曾行雨下巫陽

步月美人

遠思驚秋夢不成玉關何處玉輪橫  
風光暗與當年異  
弱質難禁此夜清  
柳影花陰聊曳步  
人間天上謾多情  
憑誰親向嫦娥道  
莫為孤眠損舊盟

點唇美人

笑取紅綿拭鏡光  
香臺珍重曉來粧  
瓠犀微露朱櫻破  
猩血輕調玉笋忙  
樊素年來添嫵媚  
樂天老去更踈狂

金籠鸚鵡驚相見却怪風前笑語香

折花美人

粉香罷染鏡中丹百轉千迴繞畫闌夜合有香迎日暖  
宜男無語怕春寒深紅在手顏初破淺白沾衣露未乾  
浪蝶狂蜂莫相妬粧成要使阿奴看

送陳德脩都憲之河南

青雲黃甲早飛騰歷歷賢勞獨有稱纔領除書遷左牧  
又看徵詔進中丞後生久已歸山斗元首從來藉股肱

記取長安今日別上元時節正張燈

桃接梅

何事玄都解出神孤山換骨絕纖塵劉郎此日非前度  
姑射于今是後身自許堅貞盟晚節恥將顏色媚穠春  
從今結就調羹實不記瑤池有故人

送惠安伯奉使還朝

聖明天子重親袞冕臨軒遣大臣親捧金書辭北闕  
遠持玉節下西秦波分雨露天潢近慶衍宗支帝命申



歸去重瞳應咫尺為言萬物總回春

送鄭德新方伯致仕

霄漢勲名喜致身薇垣望重自西秦  
心應許國終懷赤鬢為憂民早博銀  
公道定知歸太史清朝無愧作閒人  
從今勘破黃梁夢習靜虛堂養谷神

韓愚夫黃門具慶詩

忠獻雲仍衍慶長一門遭際此非常  
兩兒價重連城璧二老眉齊具慶堂  
烏府黃門同寵渥錦袍珠翟共康強

亦知積德君家事壽域天開自聖皇

送李叔淵繡衣還朝

二首

青春豈繡幾人如玉斧從容引鷺車買鐵十年曾鑄劍  
典衣無日不收書似聞彫瘵勞存問那復豺狼待掃除  
去近九重應簡在西行聲價重璫璣

舊持憲節過西秦銜命重來是故人八郡風霜千里遠  
三場條格一時新杜陵骨瘦多憂國范相心勞總為民  
料得巡邊應有待藩邦爭識玉麒麟

送戈勉學太守之廉州

天家有詔起龔黃暫撫東夷近海鄉  
夾道旗亭榕葉暗繞城村落荔枝香  
扶桑日上春無瘴合浦珠還夜有光  
壯志不須嗟遠別男兒出處付穹蒼

太行家慶為李叔淵侍御題

車馬駢闐鼓笛譁德星今聚李膺家  
三千鍾乳和玄露百萬蒲萄薦紫霞  
金縷喜承新寵渥青氈還是舊生涯  
賢郎便道稱觴處天上蟠桃正著花

灞陵別意送夏廷贊行人還高郵

官河夾岸柳依依有客西來衣錦歸  
詩思喜隨花競發離心應比絮先飛  
馬頭岳色春雲淡樹底河聲夜雨微  
此去寧親兼入覲清時忠孝獨無違

春日即事

簾捲東風淑景移朱樓翠閣日遲遲  
柳烟分綠侵書幌花雨飛香入硯池  
物外功名渾似夢眼前風物總宜詩  
人生對景須張主莫待秋霜染鬢絲

春宮詞

晝漏遲遲淑景長  
此中別是一風光  
彩雲畫棟來天女  
麗日文牕語雪娘  
怪石當堦飛翠濕  
小橋臨水落花香  
龍笙鳳管開筵處  
只把關雎備樂章

送汪文燦大叅陞任廣東憲長

薇垣督餉未三年  
持憲遐方簡任專  
霜落梅天消瘴雨  
風清驛路掃蠻烟  
訟庭坐久榕陰合  
賓席開時荔子鮮  
見說外臺風紀重  
易冠還上五雲邊

卷五  
挽閻文振方伯

名高黃甲際昌期八十年來鬢已絲  
風月襟懷涵酒量乾坤清氣入詩脾  
明時解組開三徑暮夜懷金畏四知  
此日蓋棺身事了士林誰不為含悲

壽楊宗德行人父八十

薰風四月動朱絃畫錦堂開上壽筵  
翠栢蒼松春不老少微南極夜同躔  
艾強曾慰良民望登第今推令子賢  
從此仙家消息好等閒滄海變桑田

送西安袁大綸推府應召之京

萬里青雲早致身三年丹筆斷如神  
奇才自古成梁棟靈囿于今有鳳麟  
藉藉芳名聞北闕煌煌休命下西秦  
法星昨夜光芒正照見蘭臺第一人

送吳世安繡衣還朝

按部賢勞歲已更乘驄又見上神京  
從來白簡名偏重此去金吾膽亦驚  
泰運喜同文運盛法星還近帝星明  
埋輪攬轡男兒事肯使前賢獨擅名

送張邦鎮都憲巡撫畿內

西省纔承寵命新中臺又見荷絲綸如今八座多求舊  
自古三邊重得人萬里河山同日月九重霄漢動星辰  
北門鎖鑰知均是會見沙場靖騎塵

輓張尚質主事之室

登科纔拜粉闥郎旋對西風泣孟光紅錦恩頒新制誥  
紫羅恨滿舊香囊人間無計留穠李地下何緣種海棠  
幾度五更孤夢覺空餘殘月照儀床



清溪小隱卷

漫倚山椒結隱居長歌真欲愛吾廬座中每下高人榻  
門外時來長者車楊柳風恬春院靜梨花月冷夜牕虛  
蕭然身世渾無累讀盡人間萬卷書

園亭小集

煖玉流霞次第傳滿前吟料自無邊風回牕竹驚香粉  
雨綉亭苔蝕紫錢斷續蟬聲琴入奏翩颺鶴袂雪當筵  
飲餘燕坐心如許讀到南華第幾篇

送仰茂才南還晉卿憲使之子

秋雨長安送小坡青雲麟趾思如何墨池字逼蘭亭叙  
藝苑才高白雪歌獬豸定知傳舊物珊瑚又見長新柯  
干將此去須重礪珍重名家進士科

次韻無題

二首

日自西馳水自東悲歡得喪古今同詩能寓識逢山鬼  
燭解藏機仗木童悍將志驕難慮敵名姝顏好亦和戎  
憑君莫話神仙事瀛海茫茫際碧空

身世浮沈不繫舟，人生踪跡可能求。  
春風水漲桃花渡，夜月烟迷燕子樓。  
簾箔低垂燈已燼，輜輶高舉藥難留。  
少年莫為多情苦，只恐多情易白頭。

送嚴茂才省兄南歸宗哲太守之弟

楚天空濶楚山青，秀出奇才屬地靈。  
藝苑爭傳鸚鵡賦，雲霄齊振鳳凰翎。  
筆端造化移衡岳，胸次波濤小洞庭。  
珍重難兄賢太守，好將科甲繼芳聲。

送韓德夫繡衣南還天長展墓

泣血三年眼欲枯  
邈綿寧忍忘中都  
輜車帶月過金陡  
清節凝霜照玉壺  
官道好山隨去馬  
故園宰樹慘啼烏  
畫遊況是人生願  
料得心情異二蘇

春日郊行

翠滴終南雪始乾  
越羅衣薄逗春寒  
路從興慶池邊過  
花向玄都觀裏看  
散乳琴泉通石竇  
調聲簧鳥咽林端  
熙熙到處逢人醉  
爭說皇恩似海寬

過雅世隆方伯別業

邯鄲夢破小功名別墅新開近斗城  
一井曉烟桑葉暗  
半簷晴日杏花明  
吟邊杖履恣游樂  
塵外軒車絕送迎  
寄語東山謝安石  
莫因高卧負蒼生

春興

春來無日不題詩  
只把題詩當酒卮  
隱几正當鶯喚處  
捲簾恰是燕歸時  
垂楊影逐東風軟  
紅杏香含麗日遲  
九十韶華等閒事  
流年光景却成癡

追和元孟溪湖上之作

四首

愛花不惜買花錢博得春風滿目前  
晴蝶舞酣紅杏日  
曉鶯啼破綠楊烟隔溪鐘磬來僧寺  
入座笙歌在妓船  
俯仰乾坤都是樂何須物外覓神仙

南山招我亦良緣恨不中間結數椽  
草色正當行仗外  
鶯聲恰在舞筵前行行細柳搖金鏤  
點點風榆落翠錢  
更愛小橋添畫意一竿斜繫釣魚船

江南雨霽不勝春況是湖山絕點塵  
蛙鼓喧來鳴岸芷  
燕泥銜去墮江蘋錦堤花柳迷金勒  
畫舫笙歌醉玉人

寫興從來几幾首總輸坡老獨清新

杭州風物錦成堆送目閒登百尺臺舉棹吳江翻雪去  
捲簾天竺送青來佳人倦舞妬飛燕游子停盃歌落梅  
却憶風流蘇太守肩輿忘却醉中迴

郊興

數聲啼鳥隔烟霞帖帖龍駒踏軟沙紫陌好風多柳絮  
錦溪新水半桃花松楸寂寞將軍墓臺殿參差釋氏家  
樹底瓦盆盛濁酒喜看野老話桑麻

春日東園與客小集

花時賓從一徜徉  
簾捲東風日正長  
莫厭梁園頻雅會  
也勝曲水共流觴  
香蟠翠霧迷金獸  
歌裊新聲落畫梁  
更有當筵清絕處  
流鶯百轉在垂楊

偶書

三首

不避流言不避嫌  
維藩無愧足安恬  
道心向上初知進  
詩思新來似覺添  
臨水有時閒把釣  
看山無日不鉤簾  
樂天元是吾家趣  
何必君平為我占



惆悵何須詠四愁  
茫茫塵世且沈浮  
一枰黑白真為敵  
衆口酸鹹苦不侔  
萋斐竟能成貝錦  
戾郵惟恐謗膚裘  
大東不見西人子  
粲粲熊羆私與舟

此生何必卜窮通  
造化從來自至公  
持已不妨提四印  
待人恒欲戒三窮  
雲開遠岫連天碧  
月漾澄波徹底空  
俯仰乾坤都是易  
管窺應笑老揚雄

食薏苡仁飯索蕭子豫少叅和韻

伊耆知已入圖經  
佳實如珠性亦靈  
綺席芬芳輕黍稷

青囊錯落間參苓伏波老子曾招謗吏部先生愛著銘  
豈但充腸堪作膳扶危還許制頽齡

送熊良佐方伯之湖南

纔向西秦種紫薇又從南楚振餘輝清名自昔公多著  
輿論元來衆所歸華岳有圖歸使索湖湘無土浣征衣  
遙知別後相思處目斷江樓一鴈飛

送許進士還朝季升都憲之子

奉使西來荷寵恩德人真見此溫溫百年庭訓詩兼禮

一代賢科弟與昆  
騏驎超羣元有種  
珊瑚出海豈無根  
忠宣不愧希文後  
汗簡勲名取次論

首夏

清和時節屬朱明  
沉復南郊禮載迎  
花氣滿庭晴霧合  
槐陰匝地午風清  
池亭引水新泉出  
石鼎烹茶活火鳴  
更喜夜來龍試雨  
入簾草色翠盈盈

端陽宴中題扇分送鎮巡藩臬

一年佳節屬端陽  
小殿鈎簾日正長  
絲竹喜同秦客醉

帆檣翻笑楚人狂紅衣出水蓮初試白雪登盤麥始嘗  
見說南薰能解愠還須大手為宣揚

過邵陽溫穆王東園延春亭感懷

東皇促駕肯淹留井轄於人豈易投露洗怨紅花淚滴  
烟迷寒翠柳眉愁當年吟賞添新況此日經過感舊遊  
斜日烏啼賓客散山亭無恙水空流

夏日內燕後偶成

日上扶桑曙色分湘簾如水逗南薰雀屏巧刺籠金飾

鳳竿輕鐫暖玉紋縹緲寶香穿仗入鏗鐙環珮隔花聞  
華堂宴罷高眠處肯向陽臺夢楚雲

山居為毛仲德隱士作

青山面面繞幽居高隱中間興有餘花徑煖香來縹緲  
竹牕晴影落扶疎雪飛洞口歸巢鶴金躡波心出浪魚  
我亦喜無塵鞅累何時一訪隱君廬

閒興

富貴功名總不關昔人高節許追攀心如流水淡中淡

身比浮雲閒更閒霜雪後凋同萊竹炎涼不改共青山  
年來事事皆踈嬾惟有吟詩興未慳

送高世德行人服闋之京

年少亨衢早致身松崖高弟有斯人使藩不辱君王詔  
營墓誰憐孝子貧舊賜緋袍深雨露重依丹陛近星辰  
故園聽說松楸在可有鄉心入夢頻

送秋官謝維章亞卿還朝

叅相蔽垣舊識荆十年南北兩馳情手持三尺來京國

人迺雙旌入雍城紫極曉晴初日麗金天秋靜法星明  
掃除兇穢清關陝從此姦邪夢亦驚

秋意

金帝行權代祝融先聲已自到梧桐涼生虛室蟾光澹  
爽入疎簾露氣通梁燕刻期辭舊壘池荷一夜墜鵝紅  
青奴白扇均休怨夏日貂裘亦爾同

送韓德夫繡衣起復之京

脫却麻衣著繡衣遠乘驄馬謁金扉雲開玉闕雙龍擁

秋靜瑤空一鶚飛攬轡舊聲餘上谷含香新奏入端闈  
獨憐鄉國南畿近已見春風畫錦歸

送長史之京

獨憐外患一朝加要識榮枯似轉車魚目混珠難卒辯  
青蠅點壁未為瑕身羈請室心還赤夢遶嚴庭鬢易華  
去去不須垂別淚天家雨露正無涯

送錦衣趙廷昭揮使還朝

中朝人物美丰姿少日才名衆見推身惹爐烟分虎衛



口銜天語下龍墀來時滿月隨金節歸路清飈引綉旗  
忠慎如君真不忝好同臯契佐雍熙

送少司徒許季升之京

平生豪氣薄雲霓魯直曾勞御筆題才大似嫌秦地小  
名高翻覺華山低爭看赤手扶黃道又見徵書降紫泥  
此去為霖康四海還祈餘澤被關西

質軒

矮屋何須桷與椽并刀誰復剪茅茨雕鐫綵繪非吾事

樸厚渾堅實爾宜  
宓瑟虞琴聲最淡  
太羹玄酒味偏奇  
塵埃多少繁華眼  
不是商人詎得知

秋祀山川偶成

珊珊玉珮候嚴更  
躬祀山川體至情  
匝地風雲初繚繞  
一天星斗正澄清  
洋洋神貺應來格  
肅肅愚衷愧未誠  
但願滿郊禾黍熟  
普教民物遂生成

輓耿天資少叅

接武賢科著美譽  
年來分陝獨勤渠  
春秋荏苒五旬半

風雨淒其八月初廿載守官惟祿俸平生教子祇詩書  
可憐歸瘞家山下流水依然繞故居

送張廷儀繡衣

二首

秦晉山河咫尺間繡衣人望下臺端九重朝日辭龍袞  
一道秋霜落芻冠閭闔夜深飛夢繞太行雲近舉頭看  
北風莫謾吹關雪鷹隼元來不畏寒

文章柱史擅才華獨步中臺帝所嘉雲簇朱衣魚綉芻  
霜飛白筆更生花坐令豪俠遵王度肯使奸邪小法家

歸去倘勞當寧問為言西土靖邊沙

初度自慶十一月十五日

行年四十尚蚩蚩獨喜年年物色宜  
荔挺始看穿北土梅花又見放南枝  
三川風月供詩興千里河山入酒卮  
俯仰自知無愧怍不妨吟笑到期頤

有舊識者自廣南以椰子孔雀見寄

朝來有客自災方異果珍禽忽寄將  
落爪霜寒分玉液驚心日煖閃金光  
青門未許稱瓜瓞丹穴從教有鳳凰

欲寫素書酬遠意  
衡陽無鴈到潮陽

憶西山暨鳳泉舊遊

夜夜名山入夢多  
舊遊踪跡復如何  
靈源有性藏真火  
絕壁無塵擁黛螺  
冰泮磻溪增潏灩  
雲開太白露嵯峨  
眼前有景誰收拾  
都付漁樵作浩歌

送韓淳夫府尹之應天

名魁三晉羨脩能  
萬里烟霄早進升  
天錫徵書來畫省  
春隨行旆入金陵  
夕郎自昔推忠藎  
京兆于今借股肱

接武昌黎應不忝懸知從此更軒騰

寄戴松崖司寇

別後心旌鎮日懸相思還有夢相牽  
江雲渭樹三千里  
秋月春花十四年  
嬾散西藩甘豹隱  
登庸南部喜鶯遷  
逢人未問調羹事  
且寄峰頭十丈蓮

永思堂為熊騰霄都憲作

不盡長江不盡思  
登堂無復覩嚴慈  
都臺風木傷情切  
宦海羹牆入夢遲  
蠹落遺編留素業  
塵封殘織有餘絲

浮光山水依然在緬想儀刑獨淚垂

送嚴宗哲太守乃弟冠帶南還

五馬城東送遠行那堪難弟別難兄  
烏紗此日同霑寵黃甲當年獨著聲  
春草池塘還入夢夜牕風雨最關情  
雲山杳杳牽離恨極目湖天一鴈鳴

賀新齋兄襲封汧陽王

萬國星辰拱至尊又看天使下親藩  
金函玉節今恩重伯服侯冠古制存  
帶礪河山盟冊府分封茅土及諸孫

綿綿餘澤齊天地水木還能憶本源

賀張一之憲僉之父封君八十壽


八十康強亘古稀賢郎祿養喜無違花香綠酒醺人艷  
黍熟黃雞入饌肥肯向公家輕自售每從鄉社醉扶歸  
遙知耆舊追隨處爭羨封君著繡衣

漫興

茫茫大化古還今獨向盈虛酌淺深醉後語言休著耳  
夢中富貴莫驚心青山到底成黃土白石誰云幻紫金



不見當年康節老  
弄丸終日只閒吟



小鳴稿卷五